

Լ. Գ. Խաչերյան

ԶԱՓԻ ՊԱՐԱԳԱ ԵՐԿՐՈՐԴԱԿԱՆ ՆԱԽԱԴԱՍՈՒԹՅՈՒՆՆԵՐԸ

Դասական հայերենը երկրորդական նախադասությունների իր շարահյուսական համակարգում ունի գործողության մեծ ոլորտով հանդես եկող չափի պարագա երկրորդական նախադասությունների կատեգորիա, որն իր քերականական ձևավորմամբ և իմաստային երանգներով տարբերվում է պարագա նշող մյուս կատեգորիաներից: Զափի պարագա երկրորդական նախադասությունների շարահյուսական պաշտոնն այն է, որ նրանք նկարագրում և պարզաբանում են գլխավոր նախադասության գործողության հանգամանքները՝ քանակի կողմից, չափի և աստիճանի հարաբերությամբ: Շարահյուսական հիմնական այս ֆունկցիան կատարելով հանդերձ, նրանք ամբողջ բարդ նախադասությանը հաղորդում են նաև իմաստային բազմապիսի երանգներ: Իմաստային այդ երանգների առկայությունը նպաստում է առավել վառ և հստակ կերպով բնորոշելու գլխավոր նախադասության գործողության բնույթը չափի ու քանակի տեսակետից, մարդկային մտածողության մեջ բեկվող օբյեկտիվ իրականության բարդ և նրբին հարաբերություններ դրսևորելով:

Սակայն մեր հայ քերականագետները, ելնելով այն հանգամանքից, որ չափի պարագա (ինչպես և ձևի պարագա) երկրորդական նախադասությունները միաժամանակ դուգահեռաբար դրսևորում են նաև շարահյուսական հարակից իմաստներ, պարագայական նախադասությունների իրենց դասակարգման մեջ իմաստային այդ երանգները համարել են առանձին տարատեսակներ և ըստ այդմ էլ խմբավորման ենթարկել: Այսպես, Ստ. Պալասանյանը «Որակական նախադասություններ» ընդհանուր վերնագրի տակ քննում է իր կողմից «բուն որակական» և «համեմատական»¹ հորջորջվող երկրորդական նախադասությունները, ըստ որում «բուն որակական» անվան տակ հասկանում է անցյալ դերբայը և անորոշ դերբայը իրենց կողմնակի անդամներով փբրև ձևի պարագա երկրորդական նախադասություններ: Մինչդեռ դերբայական այդ դարձվածները թեև գլխավոր նախադասության ձևի պարագայի պաշտոն են կատարում, սակայն ամենևին երկրորդական նախադասություն չեն հանդիսանում: զրա պատճառն այն է, որ նրանք զուրկ են ստորոգումից: Իսկ «Համեմատական նախադասություններ» ստորաբաժանման տակ Պալասանյանը քննության է առնում «քանակական» և «որակական» երկրորդական նախադասությունները՝ միասնաբար², այլ կերպ ասած՝ չափի և ձևի պարագաների այն տարատեսակները, որոնք իրենց հիմնական շարահյուսական պաշտոնները կատարելով հանդերձ օժտված են նաև համեմատության իմաստային երանգով: Այդ նշանակում է, որ Պալասանյանի համար չափի (ինչպես նաև

¹ Տե՛ս Ստ. Պալասանյան, Գործնական քերականություն հայերեն լեզվի, Թիֆլիս, 1874, էջ 91:

² Ե ու յ ն տ ե դ ու մ, էջ 92:

ձևի) պարագայի կառուցվածքային տարբեր տիպերը խմբավորելիս դասագասման հիմք են ծառայել շարահյուսական հենց այն զուգահեռ, հարակից իմաստային երանգները, որոնցով առհասարակ երանգավորված են լինում չափի (ինչպես և ձևի) պարագա երկրորդական նախադասությունները:

Ակադ. Ստ. Մալխասյանը խնդրո առարկա հարցի մշակման ուղղությամբ առաջնորդվում է նույն այն սկզբունքով, ինչ Պալասանյանը, լիովին համերաշխվելով նրա տեսակետին, և առավել ևս կոնկրետացնում ու սիստեմավորում է այդ բնույթի երկրորդական նախադասությունները՝ հատկացնելով նրանց միայն նոր տերմիններ: Ակադ. Մալխասյանը «Ողանակական պարագայական նախադասություն» ընդհանուր հայտարարի տակ քննում է չափի և ձևի պարագա երկրորդական նախադասությունները միասնաբար և ենթարկում դրանք երեք ստորաբաժանումների՝ ա) «Նկարագրական» (սրա տակ հասկանում է գլխավոր նախադասության մեջ իբրև ձևի պարագա հանդես եկող դերբայական այն դարձվածները, որոնք կազմվում են անցյալ դերբայով, իսկ Պալասանյանի մոտ՝ անցյալ և անորոշ դերբայներով), բ) «Համեմատական» (սրա տակ ըմբռնելով ձևի և չափի պարագաների այն տարատեսակները, որոնք համեմատության իմաստային երանգով են օժտված), գ) «Բացատրական» (սրա տակ ըմբռնում է բացատրական այն երկրորդական նախադասությունները, որոնք հիմնականում արտահայտում են չափի ու քանակի հարաբերություն՝ երկրորդաբար զրևեցնելով հետևանքի իմաստային երանգներ)՝ պարագայական նախադասությունները²:

Պրոֆ. Մ. Աբելյանը մի քիչ այլ կերպ է մոտենում խնդրին և նյութի տեղաբաշխման մեջ որոշակի ինքնուրույնություն է ցուցաբերում, թեև պետք է խոստովանել, որ նա ևս իբրև մեկնակետ ընդունում է Պալասանյանի տեսակետը. այսինքն՝ զուգահեռ արտահայտվող շարահյուսական իմաստային երանգները բավարար հիմք է համարում դրանք իբրև առանձին տրակի «պարագայական նախադասություններ» անվանելու Պրոֆ. Մ. Աբելյանը ևս չափի և ձևի երկրորդական նախադասությունները դիտում է իբրև շարահյուսական մեկ ամբողջական կատեգորիա, և դրանց քննությունը կատարում է՝ հետևյալ ենթախմբերի բաժանելով. ա) «բաղդատական խոսքեր» ենթախումբը, որն իր հերթին ստորաբաժանվում է ձ) «նմանության բաղդատական խոսքեր» (սրանց մեջ մտնում են նաև «կարծեցյալ նմանության խոսքեր»), որոնցում վերլուծվում են միայն ձևի պարագա հանդիսացող նախադասությունները, ի) «համեմատության բաղդատական խոսքեր» (սրանց մեջ մտնում են նաև «հարաբերականության խոսքեր»), որոնցում ուսումնասիրվում են միայն չափի պարագա նախադասությունները, զ) «հարաբերության բաղդատական խոսքեր» (սրանց մեջ մտնում են նաև «փոխանակության խոսքեր»), որտեղ նույնպես պարագա նախադասությունները, ը) «հարաբերության բաղդատական խոսքեր» որտեղ հեղինակը քննության է առնում գլխավոր նախադասության զործողության ձևի և չափի պարագաները՝ նրանից (գլխավոր նախադասության գործողության հեղինակը) առաջացած հետևանքը նկարագրելու շնորհիվ, գ) «բացատրական խոսքեր», որոնք կազմվում են «առանց ու» շաղկապով և բացասում են

² Տե՛ս Ստ. Մալխասյան, Գրաբարի համաձայնությունը, Թիֆլիս, 1892, էջ 121—132:

հարակից հետևանքի կամ հանգամանքի առկայությունը⁴։

Իրրև եղրակացություն պետք է ասել, որ մեր հայ քերականագետները թեև ճանաչել են չափի և ձևի պարագաները, բայց դրանք ըմբռնել են ոչ որպես ինքնուրույն և անկախ շարահյուսական կատեգորիաներ, և նյութի բաշխման ու մշակման գործում թույլ են տվել որոշ անհետևողականություններ, ելնելով շարահյուսական այդ կատեգորիաների արտահայտած իմաստային բաղմամբիվ երանգներից, որանցից յուրաքանչյուրին վերագրել են շարահյուսական առանձին միավորի արժեք։ Այդ է պատճառը, որ շատ անգամ իմաստային միեևույն նրբերանգը դրսևորող չափի և ձևի պարագաները, շնայած նրանց շարահյուսական տարբեր կատեգորիաների պատկանելիությանը, խմբավորվել և քննվել են միասնաբար նույն միավորի տակ։ Այդպես են վարվել Ստ. Պալասանյանը «Համեմատական նախադասություններ, ստորաբաժնում», ակադ. Մալխասյանը՝ «Համեմատական» և «Բացատրական պարագայական նախադասություններ» ենթաբաժիններում⁵, պրոֆ. Մ. Աբեղյանը՝ «Բաղդատական խոսքեր» և «Հետևանքի խոսքեր» ենթախմբերում⁶։ Ավելին, նման մոտեցման արդյունքը եղել է այն, որ սխալ կերպով շարահյուսական տարբեր կատեգորիաները վերագրվել են այնպիսի երկրորդական նախադասություններին, որոնք իրականում այդպիսին չեն։ Ընդհակառակն, նրանց արտահայտած շարահյուսական հիմնական ֆունկցիան բոլորովին այլ բնույթ ունի, քան երկրորդաբար, իբրև առանձին նրբերանգ, դրսևորվող նրանց իմաստային հարաբերությունները։ Ասվածից հետևում է, որ հիշել հեղինակների միակողմանի մոտեցումը տվյալ դեպքում բխում է այն ելակետից, ըստ որի նրանք չեն տարբերել շարահյուսական հիմնական ֆունկցիան՝ երկրորդական, օժանդակ շարահյուսական իմաստից և նախապատվություն տալով վերջինին, մոռացություն են տվել առաջինը՝ հիմնականն ու որոշիչը։

* * *

Դասական հայերենում չափի պարագա երկրորդական նախադասությունները կազմվում են քերականական հետևյալ միջոցներով.

ա) Չափի պարագա երկրորդական նախադասությունները գլխավոր նախադասությանը կապվում են «զի», «թէ», «որ», «մինչ», «մինչև», «մինչ զի», «մինչ անգամ», «որպէս զի», «մինչչև» շաղկապներով, ինչպես նաև «որքան», «ցորքան», «որչափ» հարաբերական բառերով և «որչափ թէ» բառակապակցությամբ։

բ) Գլխավոր նախադասության մեջ իբրև հարաբերյալներ հանդես են գալիս «այնչափ», «քանի», «այնքան», «այնու», «այսպիսի», «դոյնչափ», «հոյնչափ» բառերը։

Չափի պարագա երկրորդական նախադասությունները կարող են վերաբերվել ա) գլխավոր նախադասության ամբողջ բայ-ստորոգյալին և ցույց տալ նրա գործողության ծավալն ու տարողությունը՝ նկարագրելով միաժամանակ զըլխավոր մասի գործողությունից առաջացած իբրև հետևանք տեղի ունեցող գործողություն։ բ) նրանք կարող են վերաբերվել գլխավոր նախադասության միայն

⁴ Տե՛ս Մ. Աբեղյան, Ախարհարարի շարահյուսությունը, Վաղարշապատ, 1912, էջ 310—315։

⁵ Տե՛ս Ստ. Պալասանյան, Նշված աշխատությունը, էջ 92։

⁶ Տե՛ս Ստ. Մալխասյան, Նշված աշխատությունը, էջ 131—132։

⁷ Տե՛ս պրոֆ. Մ. Աբեղյան, Նշված աշխատությունը, էջ 310—314, 314—315։

ստորոգելիական վերադիրին, երբ տվյալ հատկանիշը հանգույցի միջոցով վերագրվում է ենթակային: Վերջին դեպքում չափի պարագա երկրորդական նախադասությամբ արտահայտվում է, տվյալ հատկանիշի ինչ աստիճանով կամ քանակով հանդես գալը: Այդ տիպի երկրորդական նախադասությունները նույնպես դրսևորում են հետևանքի փմաստային երանգ:

Նման կառուցվածք ունեցող երկրորդական նախադասությունները մեծ մասամբ գլխավոր նախադասություններին կապվում են «զի» շաղկապով և ունենում են «այնչափ», «քանի» հարաբերյալները: Վերջիններս թեև գլխավոր նախադասության մեջ կատարում են չափի պարագայի պաշտոն, սակայն նրանք այնտեղ ունեն ձևական բնույթ, տրովհետև նրանց կոնկրետ բովանդակությունը բացահայտվում է միայն երկրորդական նախադասությամբ: Առավել կարևոր է այն հանգամանքը, որ հենց այդ հարաբերյալների առկայությունը գլխավոր նախադասության մեջ հնարավոր է դարձնում «զի» շաղկապով միացող երկրորդական նախադասություններին չափի պարագայի շարահյուսական իմաստ հաղորդել. այլապես, առանց այդ հարաբերյալների, երկրորդական նախադասությունը ձեռք կբերի պատճառի պարագայի շարահյուսական ֆունկցիա:

«Եվ այնչափ կորոյս (շինուածս բագնացն), զի յետ այնորիկ ոչ ինչ ոք յայնմ տեղուց նշմարսնս կարէր գտանել, ոչ քարի և տշ փայտի, ոչ ոսկւոյ և ոչ արծաթոյ, և ոչ բնաւ երեւէր, թէ լեալ ինչ իցէ անդ» (Ագաթանգեղոս, ՊԶ, 424):

Վկայված օրինակում երկրորդական նախադասությունը ամբողջությամբ վերաբերում է գլխավոր նախադասության բայ-ստորոգյալին, ուստի և վերջինս դրված է պարզ կազմությամբ (կորոյս):

«Եւ այնչափ շար էին արքն երկոքին, զի անգամ իւրեանց ումեք ոչ ողորմէին, այլ անխնայութեամբ դատէին զօտարս և զիւրեանց ընդանիս» (Բիւզանդ, ՊԶ, 271):

Տվյալ օրինակում երկրորդական նախադասությամբ նկարագրվում ու բացահայտվում է գլխավոր նախադասության բայ-ստորոգյալի հատկանիշի չափը, աստիճանը՝ հետևանքի փմաստային երանգով օժտված: Այս կառուցվածքի բարդ նախադասությունների կարևոր առանձնահատկությունն այն է, որ գլխավոր նախադասության բայ-ստորոգյալը իր կազմությամբ միշտ բաղադրյալ է լինում, այսինքն՝ բաղկացած է լինում հատկանիշ արտահայտող ստորոգելիական վերադիրից և ստորոգումն իրագործող հանգույցից:

Երևույթը նույնն է նաև հետևյալ օրինակում. երկրորդական նախադասությունը չափի պարագայի իմաստ է հաղորդվում շնորհիվ «քանի» հարաբերյալի: Եթե չլիներ այդ հարաբերյալը, երկրորդական նախադասությունը անմիջապես կստանար պատճառի իմաստ.

«Քանի լիրբ է խորամանկ խաբէութիւն նորա, զի երկիցս և երիցս զփորձ առեալ կշտամբեցաւ և ոչ ամաչէ» (Եղիշե, ՎՎՊ, 86):

Ի դեպ՝ «քանի» հարաբերյալով կազմված և «զի» շաղկապով միացած երկրորդական նախադասությունները չափի շարահյուսական իմաստով շատ հազվադեպ գործածություն ունեն դրաբարում:

Իմաստային նույն հարաբերությամբ գլխավոր նախադասության մեջ բայ-ստորոգյալի շրջումն ձևին հանդիպում ենք, երբ բարդ նախադասությամբ արտահայտված ամբողջ հաղորդումը ավելի արտահայտիչ, աշխույժ բնույթ է կրում.

«Եւ առ բանն աստուծոյ (Դանիէլ) այնչափ էր հօգօր 'զի զինչ հայցէրն յաստուծոյ առնոյր, և զոր ինչ ասէր՝ այն լինէր» (Բիւլ., ՊԶ, 59):

«Այնչափ էր երկիւղած (Յուսիկ) ի տեսնէ, զի ոչ զսէր և ոչ զահ թաղաւորին առ ոչինչ համարէր» (Բիւլ., ՊԶ, 49):

Բայց ունենալնաւ կատուցվածքային միեւնոյն տիպին պատկանող այնպիսի բարդ նախադասություններ, որոնցում երկրորդական նախադասությունները պարզապէս գլխավոր նախադասության բայ-ստորոգյալի հատկանիշի չափն ու աստիճանն են նշում, առանց իմաստային որեւէ այլ երանգի.

«Այսչափ ամբ են, զի տեսի ես զքեզ, և յամենայն զօրութենէ քումմէ ծառայեցեր դու ինձ միամտութեամբ. և ես գոհ էի զվաստակոց քոց և ունէի ի մտի կեցուցանել զքեզ. ընդէ՞ր ոչ առնես զկամս իմ» (Ագաթանգեղոս, 30):

Երկրորդական նախադասությունները կարող են դրսևորել նաև նպատակի իմաստային երանգ: Այգ դեպքում երկրորդական նախադասությունների բայ-ստորոգյալները դրվում են 2-րդ ապառնի միայն ըղձական եղանակի իմաստով. իսկ գա, իր հերթին, նշանակում է, որ ըղձական եղանակի իմաստը ինքնին նշում, ակնարկում է մի այնպիսի գործողություն, որի կատարումը ցանկալի է, որի մեջ սուբյեկտիվ մոմենտը շեշտված է: Հետևաբար նպատակն էլ ուրիշ բան չէ, եթե ոչ սուբյեկտիվ մղում, ձգտում տվյալ հեռանկարին կամ մտադրության հասնելու համար: Ասվածից կարելի է եզրակացնել, որ նպատակի իմաստը արդեն առկա է 2-րդ ապառնիով արտահայտված ըղձական եղանակի նշանակության մեջ.

«Բայց սակայն արծակել տալ ոչ կարացին (աւագք և խորհրդականք թագաւորի), այլ արկին յայն չափիս, զի աքսորեսցի միայն» (Բիւլ., ՊԶ, 137):

Վկայված օրինակում գլխավոր նախադասության գործողությունը կատարվում է այն նպատակով («արկին յայն չափ»), որպեսզի տեղի ունենա երկրորդական նախադասության գործողությունը, որի իրագործումը ցանկալի է, նպատակահարմար, ուստի և գլխավոր նախադասության ենթակայի շահագրգռվածության մոմենտը երկրորդական նախադասության գործողության իրականացմամբ՝ միանգամայն ակնբախ է, («զի աքսորեսցի միայն»): Մյուս կողմից, երկրորդական նախադասության բառակազմի մեջ օգտագործված միայն մասնիկը դրված է սահմանափակման իմաստով, այսինքն՝ գլխավոր նախադասության գործողությունը կատարվել է այն նպատակառումով, որպեսզի տեղի ունենա երկրորդական նախադասության միայն նշված գործողությունը և ոչ ուրիշ կարգի գործողություն:

Իմաստային նույն հարաբերությունը (նպատակ) կարող է դրսևորվել նաև «թէ» շաղկապով միացող երկրորդական նախադասություններում.

«Այլ լուսաւորացն այնչափ ինչ է, որպէս աստուածատուր զիրք ասեն՝ քէ եղիցին ի նշանս և ի ժամանակս և յաւուրս և ի տարիս» (Եզնիկ, ԻԱ, 152):

Շարահյուսական համաձայն հարաբերություններ, բայց գործածության առավել նվազ հաճախականությամբ, կարող են դրսևորվել «որ» շաղկապով.

«Այդ ո՞վ իցէ ասեն այնչափ մոլեգին որ ոչ սիրիցէ զտէրն իւր»: (Ոսկեբերան, Մեկնութիւն Սուրբ Աւետարանի, էջ 138):

«Եւ (Փիսակն) այնչափ զայրացոյց գրդեաց յուզեաց դրդեաց սրտմտեցոյց բարկացոյց զթագաւորն Պարսից ի վերայ արքային Հայոց, որ ապա առ հրաման ի նմանէ...» (Բիւլ., ՊԶ, 78—79):

Ինչպես կարելի է նկատել վերոբերյալ օրինակներից, «դի», «որ» շաղկապներով միացող երկրորդական նախադասությունների մեծ մասը հիմնականում նկարագրում և պարզաբանում են գլխավոր նախադասության բայ-ստորոգյալի հանգամանքները՝ չափի տեսակետից, սակայն ընդհանրապես երանգավորված՝ հետևանքի և նպատակի իմաստային առումներով: Նրանց բնորոշ առանձնահատկությունն այն է, որ նրանք հանդես են գալիս, շարահասության տեսակետից, միշտ գլխավոր նախադասությանը հետագաս դիրքում:

Բայց զրաբարում կան նաև պարագա երկրորդական նախադասությունների այնպիսի տարատեսակներ, որոնք արտահայտելով հանդերձ փրենց շարահյուսական հիմնական ֆոնկցիան (չափի պարագա լինելը), օժտված են նաև համեմատության իմաստային երանգով, ըստ որում այդ համեմատությունն էլ յուրաքանչյուր կառուցվածքային առանձին տիպերի դեպքում բազմազան է լինում:

1. Հավասարություն ճշող չափի պարագա նախադասություններ. — Բարդ նախադասությունների կառուցվածքային այս տիպը իր գլխավոր և երկրորդական մասերով գործողության նույն ծավալն ու տարողությունն ունեն: Գլխավոր նախադասությամբ նկարագրվում է այնպիսի գործողություն, որի տևողությունը ուղիղ համեմատական է երկրորդական նախադասությամբ նկարագրված գործողությանը: Այդ նշանակում է, որ գլխավոր նախադասության գործողությունը որոշվում և սահմանափակվում է՝ նկարագրելով երկրորդական նախադասության գործողությունը չափի նույն հարաբերությամբ: Այդ իսկ պատճառով երկրորդական նախադասությունները գլխավորին կապվում են քերականական այնպիսի միջոցներով, որոնք ինքնին նշում են սահմանափակում («մինչև», «մինչ», «մինչ-դի» շաղկապներով): Իսկ գլխավոր նախադասության մեջ առկա են լինում «այնչափ», «այնքան» հարաբերյալները, որոնք առավել բացահայտ կերպով ընդգծում են գլխավոր մասի գործողության ծավալի հավասար, համապատասխան լինելը երկրորդական մասի գործողության ծավալին: Շարահասության տեսակետից նման կառուցվածքի բարդ նախադասությունների երկրորդական մասը միշտ հետագաս է լինում:

ա) Այս ենթատեսակին են պատկանում ժամանակի պարագա հանդիսացող նախադասությունների մի մասը, որոնց գլխավոր նախադասությունները փրենց գործողությամբ միշտ նախորդում են երկրորդական նախադասություններին և որոնց ժամանակային տևողությունը սահմանափակվում է վերջիններով: Այդ կառուցվածքի երկրորդական նախադասությունները իմաստային անցում են կատարել դեպի չափի պարագա նախադասություններ:

«Եւ ետ հրաման քերել զկողս նորա երկաթի քերչօք, մինչև ոռոգան վայրքն ամենայն յարենէ նորա» (Ագաթ. 65):

«Զայս իբրև արարին, փակեցին ի ներքս րազմութիւն ձկանց յոյժ, մինչև պարպատէին ուռկանք նոցա» (Ղուկասու, 64):

«Յայնժամ սկսան սատակել և կոտորել, մինչև ոչ թողին յերիտասարդաց մինչև յայն, որ բնաւ զաջ և զլախ ոչ գիտէր» (Ագաթ. 23):

Թեև վկայված օրինակներում չափի հասկացողությունը տիրապետող, գերիշխող է, բայց դեռևս զգալի է նաև ժամանակի պարագայի բացարձակ կերպով չափի պարագայի արտահայտվելու միջավայր երկրորդական նախա-

դասությունը, գլխավոր նախադասության կազմում հանդես է գալիս «այնչափ» հարաբերյալը:

«Այնչափ փոփոխումն գտեալ երանելոյն Պաւղոսի, մինչև անուանն եւս փոփոխումն լինէր» (Եւթաղ, 83—84):

Սույն օրինակում ուշագրավ է հետևյալ հանգամանքը. գլխավոր նախադասության բայ-ստորոգյալը արտահայտված լինելով անցյալ դերբայով, նրա ենթական իր որոշիչի հետ միասին դրվել է սեռականով («երանելոյն Պաւղոսի»), մի երևույթ, որը շատ բնորոշ է գրաբարում դերբայական կառուցվածք ունեցող նախադասությունների համար: Սակայն այդ կառուցվածքի նախադասությունները հայերենի հետագա զարգացման ընթացքում զրկվեցին իրենց կենսունակությունից և դադարեցին գործելուց միջին հայերենից այս կողմ:

Ընդամենը մի անգամ Եզնիկի մոտ ունի տիպի բարդ նախադասություններում «այնչափ» հարաբերյալի փոխարեն գործածվել է «այնքան» հարաբերյալը:

«Որոց այնքան կամակոր յամառութիւն եղեւ, մինչև յայնչափ ի բազում ի նախրաց փրկիստփայիցն աստուածոց և ոչ մի աստուած ըմբռնել» (Եզն., ԵԱ, 160):

Այս բարդ նախադասության երկրորդական մասի բայ-ստորոգյալը անորոշ դերբայով է դրված, որի եղանակային, ժամանակային և դիմային հարաբերությունները բացահայտվում են միայն գլխավոր մասի բայ-ստորոգյալի գլխավոր ձևից: Դերբայական նախադասությունների այս տիպերը ունչապես շատ բնորոշ են դասական շրջանի հայերենին:

Ինչպես տեսնում ենք, «այնչափ», «այնքան» հարաբերյալների առկայությունը գլխավոր նախադասության մեջ քերականական օժանդակ միջոց են հանդիսանում չափի պարագայի դրսևորման շեշտված, ընդգծված իմաստի համար:

Շարահյուսական հարանման հարաբերություններ դրսևորվում են նաև «մինչ», «մինչ զի» շաղկապներով միացող չափի պարագա երկրորդական նախադասությունները, որոնք, սակայն, շատ սակավադեպ գործածություն տունեն.

«...թէ գազանք ահագինք են, և վիշապք և օձք և այլ ճճիք վնասակարք, և մարդն այնչափ հպարտացեալ է՝ մինչ ըստ Աստուծոյ երկիւղին սահմանս արտաքոյ ելեալ անսաստէ, եթէ այնպիսի զարհուրեցուցիչք չէին՝ որչափ ևս առաւել չկայր երբէք յականստանի» (Եզն., ԵԱ, 44—45):

«... և շրջշրջէին զնա անդէն, մինչև առ հասարակ ծակոտեցան մանրիկ մարմինք նորա, մինչ զի ոչ մնաց ի նմա տեղի ողջ» (Ագաթ. 66):

Նպատակի իմաստային երանդով է օժտված նաև «մինչ զի» շաղկապով միացած երկրորդական նախադասությունը, երբ գլխավոր նախադասության մեջ «մինչ զի» բարդ շաղկապին համապատասխանում է «այնքան» հարաբերյալը.

«...այնքան ուշ դնելոյ բանիս հոգ տանիցիք, մինչ զի կարող լինիք և այլոյ պատմել և համար տալ զսոսա ճշմարտութեամբ» (ՅՈ ՄՍԱ, էջ 241):

Ունենք նաև «մինչ անգամ» բարդ շաղկապով միացած չափի պարագա հանդիսացող երկրորդական նախադասությունների առավել սակավադեպ հաճախականության նմուշներ. որոնք գլխավոր մասում չունեն համապատասխան հարաբերյալներ.

«Մանաւանդ աւելի զերկու տոհմսն զաւագս տայր իւրով շարաստութեամբն հանել ընդ սուր. և անունդ առնել միահաղոյն զտոհմսն Ռշտոմեաց և զտոհմն Արծրունեաց. րառնային ի միջոյ առանց ամենայն վնասու և յանցման, մինչ անգամ և զէզսն կոտորեցին ազգացն» (Բիւլ. 72—73):

Գլխավոր և երկրորդական նախադասութիւնների գործողութեան հավասար հարաբերություն կարող է դրսևորվել նաև այնպիսի բարդ նախադասութիւնների դեպքում, որոնց կառուցվածքը հետևյալ առանձնահատկութիւնն ունի. երկրորդական նախադասութիւնը գլխավորին կապվում է «ց» նախդիրով միացած «որքան» հարաբերական բառով («ցորքան»), գլխավորին հետագաս դիրքում.

«Կին կապեալ է, ցորճան ժամանակս կենդանի է այր նորա. ապա եթէ ննջիցէ այր նորա, ազատ է, ում կամիցի ամուսնանալ, բայց միայն Տերամբ» (Թուղթ առ Կորնթացիս, 177):

Փափստոս Բուղանդի մոտ, շարահյուսական միեւնոյն իմաստով, ընդամենը մի անգամ գործածված ենք գտնում «որպէս զի» շաղկապով միացած չափի պարագա երկրորդական նախադասութիւնը.

«Նւ ամենայն երկիր սկսան ի նա նայել, որպէս թէ անդուտ երկնից ի վերուտ իջեալ փցէ, այնչափ՝, որպէս զի թէ կամիցի ոք պատմել, ոչ կարասցի» (Բիւլ. 148):

Նման կառուցվածք ունեցող երկրորդական նախադասութիւնները առհասարակ դասական գրականութեան մեջ շատ քիչ են հանդիպում և հայերենի հետագա զարգացման ընթացքում ամենեւին դադարում են գործելուց: Այդ հաճդամանքը պետք է վերագրել այն բանին, որ «որպէս զի» շաղկապը դեռևս զրաբարի ծաղկման շրջանում խոսող հանրութեան կողմից գիտակցվում և ըմբռնվում էր գերազանցապես իբրև նպատակային հարաբերություն ցույց տվող շաղկապ: Համեմատիւր նաև հետևյալ բարդ նախադասութիւնը Ոսկերեանի թարգմանված աշխատութեան մեջ.

«Միթէ և կոյսն, ասեն, ոսկտ՝վ զարդարեսցի, կամ հիւսածոյս և ընդելուզեալս մարդարտո՞վ զգենուցու: Այնչափ ինչ են լոկ պաճուճաճքն որպէս զի ոսկեհոտքն ոչ ինչ են այնմ համեմատ» (Ոսկերեան, 1, էջ 68):

Հետաքրքրական կառուցվածք ունեն այնպիսի բարդ նախադասութիւններ, որոնցում երկրորդական մասը գլխավորին միանում է «մինչև» շաղկապով: Այս դեպքում «մինչև» շաղկապը երկրորդական նախադասութեանը հաղորդում է ժխտական իմաստ, որի գործողութեան բացասման պայմաններում և միայն նրա տեղում շաղկապը տեղի է ունենում գլխավորի գործողութիւնը: Այլ կերպ ասած՝ գլխավոր նախադասութեամբ նկարագրվում է այնպիսի գործողութիւն, որը տեղում է այնքան ժամանակ, որքան տակաւին տեղի չի ունեցել երկրորդական մասի գործողութիւնը: Այս տիպի նախադասութիւնները գալիս են ժամանակի պարագա հանդիսացող երկրորդական նախադասութիւններից, որոնց մեջ արդեն չափի և աստիճանի գաղափարը տիրապետող է դարձել: Բայ-ստորոգյալների կազմութեան տեսակետից պետք է նկատել հետևյալ հանգամանքը. գլխավոր մասի ստորոգյալը կարող է դրվել դիմավոր բայի պարզ ձևով, իսկ երկրորդական մասի ստորոգյալը՝ անպայման բաղադրյալ ձևով, այսինքն՝ կազմված անցյալ դերբայից և օժանդակ բայից.

«Բեր ինձ որս և արա ինձ խորտիկս, զի կերայց և օրհնեցից զքեզ առաջի

Տեառնն մինչչեւ մեռեալ իցեմ» (Ծնունդը, 25, «մինչչեւ» = քանի դեռ, այնքան ժամանակ, որքան շ...):

«Յանկանալով ցանկացայ զայս պասեք ուտել ընդ ձեզ, մինչչեւ չարչարեալ իցեմ» (Ղուկ. 88):

Դասական հայերենն ունի նաև «որքան» հարաբերականով միացած երկրորդական նախադասություններ, որոնք թեև նվազ հաճախականությամբ են հանդես գալիս, սակայն լինելով նորագոյացումներ, օժտված են եղել մեծ կենսունակությամբ. այդ է պատճառը, որ հայերենի զարգացման հետագա փուլերում գնալով ծավալվել ու տարածվել են և հանդիսացել են չափի պարագա նշող նախադասությունների բնորոշ և հիմնական ձևերից մեկը:

«Տուր ինձ գտեղիդ քո զայգ զկալդ. և շինեցից այդր սեղան Տեառն, արծաթոյ ուրման արժիցէ՝ տացես ինձ զդա» (Մնացորդաց, 356):

Սակայն հենց գրաբարի ծաղկման շրջանում առավել լայն տարածում և կենսունակություն են տունեցել «որչափ» հարաբերականով միացած երկրորդական նախադասությունները և ժամանակակից հայերենում էլ, շարահյուսական նույն ֆունկցիայով, ունեն գործածության մեծ հաճախականություն: Պետք է ընդգծել, որ այդ հանգամանքին նպաստել է «որչափ» հարաբերականի բառային իմաստը, որն ինքնին ցույց է տալիս քանակային այնպիսի հարաբերություն, որով բացահայտվում և կոնկրետանում է գլխավոր նախադասության բովանդակությունը՝ չափի կողմից: Դրանից հետևում է, որ չափի և աստիճանի հասկացությունը գլխավոր նախադասության մեջ ըմբռնվում է երկրորդական նախադասության շնորհիվ, նրա չափով և նրան հավասար համեմատական հարաբերությամբ:

«...Ժուխ և շոգի երկրի՝ և բոց հրոյ, քանզի թեթևք են, փ վեր կողմն գնան, և քար և գերկաթ և զփայտ և զայլ ևս ինչ նոյնպիսիս, որչափ և ի վեր ոք ձգիցէ՝ ի խոնարհ միտեալ իջանեն» (Եզն, ԵԱ, 133):

«...որչափ և տեսանիցես ուրեք կոի կամ նախանձ, վասն մարմնաւոր ինչ իրաց լինին, կամ յազահոթենէ կամ ի նախանձուէ կամ ի սնապարծութենէ սկիզբն կուուոյ» (Ոսկ. հատ. 1, 505):

Ուշագրավ է վկայված օրինակներից վերջինը, որի երկրորդական նախադասության բառաշարքում «որչափ» հարաբերականին միացել է «և» շաղկապը, որով չափի հասկացությունը առավել անորոշ և ընդհանուր բնույթ է կրել:

Շարահյուսական համանման ֆունկցիան կարող են կատարել նաև «որչափ թէ» բառակապակցությամբ միացած երկրորդական նախադասությունները, որոնք, սակայն, բնորոշ և տարածված չեն.

«...զոր օրինակ լոյսդ. որչափ քէ բիւրս և հազարս լուսաւորիցէ ոչ ինչ պակաս լինի յիւրմէ լուսաւորութենէ անտի» (ՅՈ ՄԱԱ, 77):

«Որչափ հարաբերականին գլխավոր նախադասության մեջ կարող է համապատասխանել նաև «այնչափ» հարաբերակցը. այդ դեպքում բարդ նախադասության մասերի միջև սերտությունը առավել ակնբախ կլինի և չափի հասկացությունը կգրասևորվի հավասարության հարաբերական համեմատությամբ. այսինքն՝ գլխավոր նախադասությամբ նկարագրվում է մի գործողություն, որի քանակը որոշվում է երկրորդական նախադասության գործողությամբ, առանց չափի կոնկրետության, ընդհանրապես:

«Եւ փորձեալ այնչափ իշխէ սատանայ, որչափ հրաման առնու» (Եղն., 125):

«Եւ արդ ո՞ր բանք ի դէպ իցեն ասելոյ, թէ ևս ի խոնարհ և յետ Մոսիսի այնչափ ժամանակս ումեք հասանէր կեալ, որչափ վերագոյն ճառեցաք» (Քրոնիկոն, մասն 1, էջ 77):

«Որչափ» հարաբերականին գլխավոր նախադասության մեջ կարող է համապատասխանել նաև «այն» դերանունը՝ դրված գլխավոր նախադասության բառաշարքի սկզբում. նրա նյութական բովանդակությունը բացահայտում և շոշափելի է դարձնում երկրորդական նախադասությամբ նկարագրված շափի պարագան.

«Բայց ուր լինէր հանդէս, ի նշանաւոր տեղիս զնդի գնդի, դրօշու դրօշու, վաշտուց վաշտուց. յերևելի երևելի տեղեաց՝ մէն մի բռնաքար այր հրամայէին, դի բերցեն ընկեսցեն՝ շեղչ կուտել. զի որչափ լիցի, այնու երևեսցի նշանակ բազմութեանն, առ իմանալ առ վաղիւ անցելոց, իրացն ահատրութեան նշանակ» (Բիւզ. 25):

«Որչափ» հարաբերականին գլխավոր նախադասության մեջ կարող է համապատասխանել նաև «այսպիսի» հարաբերյալ դերանունը. այդ ժամանակ ուշագրավ է դիտել հետևյալ հանգամանքը. երկրորդական նախադասությունը շափի պարագա նկարագրելով հանդերձ, որոշում, բնութագրում է գլխավոր նախադասության գոյականով արտահայտված որևէ անդամի. այդ նշանակում է, որ երկրորդական նախադասությունը որոշչի շարահյուսական ֆունկցիա է կատարում՝ բնութագրելով գլխավոր նախադասության տվյալ անդամը՝ շափի ու քանակի կողմից.

«Բայց ի ձէնջ տրք փ հասակ եկեալդ էք, ոչ այսպիսի պահանջեմ աշխատութիւն որչափ դուք տրդուց ձերոց» (3Ո, ՄՍԱ, 240):

Շարահյուսության տեսակետից «այնչափ...որչափ» քերականական միջոցներով կազմված բարդ նախադասության երկրորդական մասերը կարող են լինել նախադաս և հետադաս դիրքերում. իսկ միջադաս՝ ամենևին չի պատահում:

Երբ հաղորդման կողմից հեղինակի համար առավել կարևոր նշանակություն ունի գլխավոր նախադասության բովանդակությունը. երկրորդական նախադասությունը դրվում է գլխավորին հետադաս.

«...այնչափ հեռի եմք ի փառաւորութենէն Յովհաննու որչափ երկիրս յերկնիցն. և նա ոչ արժանաւորեաց զանձն իւր վերացս կօշկացն լուծանել» (3Ո, ՄՍԱ, 156):

Իսկ երբ հեղինակը ուզում է ընթերցողի ուշադրությունը բեռնել երկրորդական նախադասության բովանդակության վրա, որպես առավել կարևոր նշանակություն ունեցող հաղորդում, այդ պեպքում երկրորդական նախադասությունը լինում է նախադաս դիրքում.

«Տես որչափ ինչ անջրպետութիւն կայ ի միջի, այնչափ վայրս հատանել անցանել հասանէ, յորպիսի բարձրութիւնս վերանալ ելանել թեօք հոգւոյն» (Ոսկ. հ. 1, էջ 482):

բ) Եթե հարկ է շեշտել, որ գլխավոր նախադասության գործողությունը կատարվում է երկրորդական նախադասության գործողությանը բացարձակորեն հավասար շափով, ապա «որչափ» հարաբերականին կարող է համապատասխանել գլխավոր մասում «նոյնչափ», «դոյնչափ» հարաբերյալները, որոնք

միշտ զրված են լինում գլխավոր նախադասության սկզբում: Այստեղ գլխավոր և երկրորդական նախադասությունների գործողության չափի հարաբերականությունը ուղղակի հավասար համեմատական է: Շարահյուսական այդ իմաստի դրսևորման համար նպաստում է հենց «նոյնչափ», «դոյնչափ» հարաբերյալների բառային իմաստը, որոնք արդեն որոշիչ, սահմանափակող նշանակություն ունեն գլխավոր մասի գործողության չափի ըմբռնման համար: «նոյնչափ» («դոյնչափ») դերանվան շնորհիվ բացահայտվում է գլխավոր մասի գործողության ճշգրիտ համապատասխանությունը երկրորդական մասի գործողության չափին: Թեև «նոյնչափ», «դոյնչափ», «այնչափ» և այլն հարաբերյալները գլխավոր նախադասության մեջ չափի պարագայի պաշտոն են կատարում, սակայն նրանց բուն բովանդակությունը, նյութական իմաստը արտահայտվում է երկրորդական նախադասությամբ, հենց այդ նպատակին էլ են ծառայում երկրորդական նախադասությունները: Ասվածից կարելի է հետևել, որ հարաբերյալների առկայությունը գլխավոր նախադասության մեջ սոսկ ձևական ֆունկցիայի նշանակություն ունի:

«Նոյնչափ սիրէր արքայն Արշակ զկինն, նոյնչափ ատեաց կինն զարքայն Արշակ, ասելով՝ թէ թաւ է մարմնով, և թուփ է գունով» (Բիւզ. 190):

«...նոյնչափ նա զարմանալի լինէր, նոյնչափ և դու չարակամ» (Ոսկ. հ. 1, 52):

Եթե «նոյնչափ» հարաբերական բառին գլխավոր նախադասության մեջ համապատասխանում է «այնչափ» հարաբերյալը, ապա այդ դեպքում բարդ նախադասության երկու մասերի գործողության ըմբռնումը լինում է միայն հավասարության համեմատական հարաբերականություն. իսկ եթե «նոյնչափ» հարաբերականին գլխավոր մասում համապատասխանում են «նոյնչափ», «դոյնչափ» հարաբերյալները, երկու մասերի գործողությունը ըմբռնվում է իբրև ճշգրտորեն հավասար չափով տեղի ունեցող գործողություններ. համատ.

«Որպէս և զջուր ուշափ ի խոնարհ ոք տանիցի այնչափ ի վեր գայ, և ուշափ ի բացեայ ոք ձգիցէ՝ նոյնչափ առաւել դիպեցուցանէ» (Ոսկ. հ. 1, 789):

«Եւ երկինք, ասեմ, ուշափ ի վեր են՝ դոյնչափ ի խոնարհ են. և դոյնչափ յամենայն կողմանց շուրջ զերկրաւ. և զերկիրս շուրջ ջուր պատէ, և զջուրն և զերկիր՝ օդ. և զօդն և զջուր և զերկիր՝ հուր» (Եզ. 140):

դ) Երբ անհրաժեշտ է ընդգծել, որ գլխավոր նախադասության գործողությունը կատարվի առնվազն երկրորդական նախադասությամբ նկարագրված գործողության չափով, որտեղ դարձյալ բարդ նախադասության մասերի միջև գործողությունները կատարվում են հավասար հարաբերությամբ, գլխավոր մասում «այնչափ» հարաբերյալից առաջ զրվում է «դոյնչափ» եղանակավորող բառը, որս իր բառային իմաստով սահմանափակիչ դեր է կատարում.

«Ուշափ ինչ նոքա վասն մեր երկիւղի առնեմ, գոնէ այնչափ և մեք վասն աստուծոյ երկիւղին առնիցեմք» (Ոսկ. հատ. 1, 149):

2. Անհավասարությունն նշող չափի պարագա նախադասություններ. — Կան բարդ նախադասությունների այնպիսի կառուցվածքներ, որոնցում գլխավոր և երկրորդական մասերի գործողությունները դրսևորում են չափի անհավասարություն: Տվյալ դեպքում գլխավոր և երկրորդական նախադասությունների գործողության համեմատական հարաբերությունը լինում է անհամապատասխան, անհամաչափ. այսինքն՝ երկրորդական նախադասությամբ նկարա-

գրվում է մի գործողություն, որի նկատմամբ գլխավոր նախադասության գործողությունը կարող է լինել առավել կամ նվազ չափով:

ա) Չափի առավելական հարաբերությունն արտահայտելու համար դասական հայերենը երկրորդական նախադասության «որչափ» հարաբերականին գլխավոր մասում համապատասխանում է «առաւել», «ևս քան զևս» հարաբերյալները, որոնք իրենց բառային փմաստով էլ ակնարկում, ընդգծում են գլխավոր նախադասության գործողության ավելի մեծ լինելը երկրորդականի հանդեպ: Այս տիպի բարդ ստորադասական նախադասություններում, շարադասության տեսակետից, երկրորդական նախադասությունը միշտ նախադաս է լինում, գլխավորը՝ հետադաս. իսկ միջադաս երբեք չի հանդիպում:

«Նախանձեցաւ Կայլն ընդ Հաբէլ. և ոչ բժշկեցաւ. և ուշափ աստուած զվէր նորա կամէր բժշկել՝ նա առաւել բորբոքիւր բարկութեամբ» (ՅՈ, ՄՍԱ, 373):

Բարդ նախադասությունների այսպիսի կառուցվածքը չափազանց կենսունակ է եղել հայերենի զարգացման բոլոր փուլերում՝ հատկապես XIX դարի հայ գրականության մեջ, ինչպես և ժամանակակից հայերենում, միայն մի վերապահությամբ. «առաւել» մասնիկը գրաբարյան ուժեղ դրոշմ կրելով, դրա փոխարեն օգտագործվում է «ավելի» մասնիկը՝ արտահայտելով շարահյուսական միևնույն ֆունկցիան:

Գլխավոր նախադասության գործողության առավելությունը (գերազանցությունը) երկրորդական նախադասության գործողության հանդեպ ընդգծելու համար, իբրև սաստկացնող մասնիկ, կարող է օգտագործվել նաև «ևս առաւել» բառակապակցությունը.

«Իսկ հոգևորական վարդապետութիւն, ուշափ և զօրանայ՝ զհոգին որ ընդունի զնա՝ ևս առաւել հզօր գործէ» (ՅՈ, ՄՍԱ, 181):

Եթե չափի անհավասարությունն արտահայտող բարդ նախադասությունների գլխավոր մասում հանդես եկող «առաւել», «ևս առաւել» մասնիկները նկարագրում են պարզապես գլխավոր նախադասության գործողության գերազանցությունը երկրորդականի նկատմամբ, ապա այնպիսի բարդ նախադասություններում, որոնց գլխավոր մասի բառային կազմի մեջ «ևս քան զևս» բառակապակցությունն է օգտագործված, արտահայտվում է հարաբերական գերազանցություն: Իմաստային այդ նրբությունը կարելի է ընկալել միայն ուշադիր համեմատությամբ.

«Ուշափ բազում ինչս կուտիցէ ոք, ևս քան զևս զանձին քունն հատանէ» (Ոսկ. հ. 1, 220, ևս քան զևս = «ավելի ու ավելի»):

Շարահյուսական նույն հարաբերությունը գրաբարում դրսևորվում է նաև այլ կերպ. երկրորդական նախադասությունը կապելով գլխավորին «որչափ» հարաբերական բառով, գլխավոր նախադասության սկզբում հանդես է գալիս բաղդատական ածականի ձևով կազմված մակբայը, որն իր բառային իմաստով ակնարկում է մի բանի «առավել» լինելը.

«Սրբեցեր զմարմինս մեր քարշելով, և զլսելիս մեր կտրելով. սրբեա և զոնգունս մեր հատանելով, քանզի որչափ տգեղս առնես զմեզ երկրաւորաւ, զեղեցկագոյնս առնես զմեզ երկնաւորաւ» (Եղիշ. 186):

բ) Գլխավոր նախադասության գործողությունը չափի տեսակետից կարող է արտահայտվել նվազական հարաբերությամբ՝ երկրորդական նախադասու-

թյան գործողութեան նկատմամբ: Այդ դեպքում թեև բարդ նախադասութիւնը կազմվում է «որչափ...այնչափ» քերականական միջոցներով, սակայն գլխա-
վոր նախադասութեան բայ-ստորոգյալը անպայման պետք է արտահայտված լինի ժխտական ձևով, ունենա իր հետ ժխտական մասնիկը.

«Ոչ այնչափ վնաս գործէ ծովն յորժամ ելանիցէ զսահմանսն ուշափ հե-
ղեղատիցէ որովայնն մեր տգիս և զմարմինս» (Ոսկ. հատ. 1, 493):

* * *

Մենք ընդհանուր գծերով նկարագրեցինք չափի պարագա երկրորդական նախադասութիւնների տարբեր տիպերի կառուցվածքը դասական հայերե-
նում, ցույց տալով նրանց առանձնահատկութիւններն ու արտահայտած շա-
րահյուսական բազմազան իմաստային երանգներն ու կատարած պաշտոնը: Այդ իսկ տեսակետից չափազանց կարևոր է ժամանակակից հայերենի երկ-
րորդական նախադասութիւնների շարահյուսական համակարգում չափի
պարագա նախադասութիւնների էվոլյուցիայի համար դասական հայերենի
այդ կարգի նախադասութիւնների քննութիւնը: Իբրև եզրակացութիւն պետք
է ասել, որ գրաբարը լինելով զարգացման լայն ուղի անցած հնադարյան լե-
զուներից մեկը, օժտված է ստորադասական կապակցութեամբ հանդես եկող
երկրորդական նախադասութիւնների, այդ թվում և չափի պարագա արտա-
հայտող նախադասութիւնների, բավականին հարուստ համակարգով. մի հան-
գամանք, որը վկայում է գրաբարի հղկված, կատարելագործված և ճկուն լե-
զու լինելու մասին: